

He Whakataau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. He kōrero tēnei e aki ana ki a tātou katoa kia kaha ā tātou mahi, ā, mā te mahi ngātahi e tere oti ngā mahi, ahakoa he aha.

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Whakaritea kia kōrero ngā ākonga i ō rātou whakaaro mō te tikanga o te taitara.

Matapakia te whakapau kaha kia oti tētahi mea. Kōrero mō te āwhina mai a ngā hoa me te mahi tahi ā-rōpū kia oti ai tētahi mahi.

Matapakia te mea kei ia tangata ōna ake kaha, ōna ake pūkenga hoki. Pēhea te pēpeke, te ngāngara, te manu, me te kararehe?

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;



- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga me ngā whakautu

1. I te aha a Kioire mā?
2. Ko wai te rangatira?
3. He aha rātou i hiahia ai ki tētahi whare?
4. He aha a Ruru i kī ai “Mā te pukumahi ka ora”?
5. Ki ō whakaaro, he aha ngā painga o te mahi ngātahi?

1. I te whakaputu rākau, i te hanga whare hoki.
2. Ko Ruru te rangatira.
3. Nō te mea i te haere mai te takurua.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He āta titiro ki ngā wāhanga rerekē o te kōrero.

He whakatakinga ā-roto, he whakaharatau

I mua i te pānui i te pukapuka, titiro ki ētahi whakataukī e pā ana ki te mahi me te pāhekoheko, hei tauira:

Mā pango, mā whero ka oti te mahi.
Ko koe ki tēnā, ko au ki tēnei kiwai o te kete.
Tama tū tama ora, tama moe tama mate.

Matapakia āe rānei ka mahi ngā kararehe me ngā pēpeke, ka whakarite ai kia whakaaro te ākonga ki ētahi tauira.

Kia oti i te ākonga te pukapuka te pānui, matapakia ngā kaha, ngā pūkenga o tēnā, o tēnā kiripuaki i roto i te kōrero. Matapakia tēnei mea te whakatangata i ngā kararehe me ngā pēpeke kia āhei ai ēnei ki te kōrero. Kei te whakaahua te paki i ngā mahi, nā reira ka taea te tuhi anō te kōrero hei mahi whakaari.

Tirohia te hanganga o te kōrero me te āhua o tōna whakaatu i tētahi mahi mai i te tīmatanga ki te otinga. Matapakia ngā wāhanga rerekē.